



*Sabtu, 23 September 2023*

**Ogen : Amos 5:25-27**



**Dibata Ngangkai Kecibal BangsaNa**



**A**cem rajin ku gereja, teridah keakifenna bas dahin-dahin pelayanen. Teptep bulan la pernah lupa ia nehken persembahen subuk perpuluhen bage pe pengataken bujur man Dibata. Enterem kalak ngidah perbahanenna e dengen mujikensa. Sekali jadi, lit pinakit si nderpa kegeluhenna, pinakit langa semal iidah anak kuta. Terbegi pe sora kusik-kusik ngataken maka pinakit si lit bas ia e erkiteken tama-tama kalak, lit si la mehuli ukurna man Acem. Berita enda seh ku cuping keluarga Acem, e maka arih me kerina keluarga guna mabaisa ertambar man kalak "si beluh." Alu erbuni-buni nandang i kalak si enterem bage pe perpulungen, ibaba me Acem ku ingan si banci nambari, lit simereken tangkal lit ka deba mereken lau penguras. Kerina enda ipakeken Acem i bas geluhna, alu tujun segelah ia madan.

Studi Kasus enda ngingetken kecibal bangsa Israel bas ogenta. Bangsa si rajin eribadah, nehken ndenden pujin ras persembahen man Dibata. La cukup sada Dibata si man sembahenna, e maka itambahina ka nembah dibata-dibata sideban e me raja, binatang ras gana-gana sideban. Kerina enda ngerehken rawa Dibata. Iukum me, ibuang me. La banci lang itadingkenna me kuta, taneh ras kerina kiniliten janah arus tading i taneh kalak sideban jadi buangen.

Arah si enda nuriken maka Dibata e meteh kecibal bangsaNa. Labo lit terligen iadep-adepenNa. I bas tatapen manusia tuhu mejile kel nden-nden pujin, persembahen siisehken bas kebaktin-kebaktin si semal silakoken. Tapi lebih asa si e ieteh Dibata kap pusuh. Pusuh si uga siersembah man baNa. Kesetiaan dengen la ngobah i bas kerina kecibal geluh e me siniarapken lit i bas bangsana. Sendalanelah babah ras pusuh bas muji Dibata, bage pe sendalanelah persembahen ras perbahanen si teptep wari.